

姦夫因姦謀殺未婚本夫專條

刑部為通行事江西司案呈安徽司傳抄前事等因相應抄單行文該撫查照可也計抄單一紙內開軍機處交出安徽巡撫程

奏請明定姦夫因姦謀殺未婚本夫專

條以資遵守等因一摺道光二十三年閏七月二十三日奉

硃批刑部速議具奏單並發欽此臣等遵查此案安徽望江縣

民宋志忠與查六壽聘定未婚妻朋氏通姦情熟圖娶為

妻獨自起意謀殺查六壽身死前據該撫將宋志忠依姦

夫起意殺死親夫例擬斬立決朋氏照律量減擬流等因

題報到部經臣部以宋志忠罪名核與定律未符題准駁令另擬去後茲據該撫以姦夫照律問擬斬候於情法似有未平並援引成案奏請明定科條等因臣等查律載妻妾因姦同謀殺死親夫姦夫處斬監候例載姦夫起意殺死親夫擬斬立決各等語此姦夫謀殺本夫專條詳繹律例內妻妾及親夫各字樣明係專指已婚而言又查例載童養未婚之妻與人通姦本夫及夫之祖父母父母並有服親屬捉姦殺死姦夫姦婦者均照已婚例問擬等語是童養未婚夫捉姦亦例有專條則姦夫殺死童養未婚夫

應照已婚例問擬亦不言而已賸惟姦夫謀殺聘定未婚本夫律例均無明文飭令各司遍查成案除該撫所引二案內余與發一案係殺死童養未婚夫與此案不同外其餘太一案係謀殺聘定未婚夫問擬斬決此外復查有嘉慶九年四川省黃廣和謀殺葉星仲又二十年直隸省霍四謀殺曹萬年道光十一年湖北省傅宗宇謀殺周定隨三案俱係問擬斬決又乾隆二十二年廣東省錢亥濫謀殺曾成茂又六十年廣西省黃召謀殺蘇亞三嘉慶五年江蘇省楊鳳山謀殺姜咬了頭又十二年直隸省傅安常



謀殺郭詳道光二年山西省喇嘛老章謀殺端多布又本年雲南省許老五謀殺周小長久六案又係問擬斬候是歷來辦理此等案件用例則斬決用律則斬候均不為無據惟援引既涉兩歧自應折衷一是以資遵守臣等復查妻之於夫其罪因名分而定在姦夫則係凡人而因姦謀殺同謀則罪至斬候起意則加以立決較凡人特為加嚴者所以懲淫惡而懲重其罰則無論姦婦之已婚未婚要與姦夫無涉竊思被殺者確係本夫殺人者確係姦夫其造意謀殺又確係因姦起衅於情毫無可原於法即萬無

可貸正可援引例意以定爰書自未便拘執律文致寬首惡臣等悉心確核應請嗣後如有姦夫因姦起意殺死未婚夫之案即照姦夫起意殺死親夫斬立決例擬斬立決如蒙

俞允所有宋志忠一犯應請

旨即行處決至姦婦朋氏於宋志忠謀斃查六壽該氏先不知情迨經盤出即行扭罵並告知伊父轉向屍親告知破案情尚可原查姦夫自殺其夫案內不知情罪應擬絞之姦婦事後首告者例得夾簽聲請減流今朋氏尚未成婚核

與已婚妻因姦致夫被殺者有間自應再減一等擬杖一百徒三年杖決徒贖其私埋匿報罪應擬杖之地隣金松如等均應如該撫原題完結所有獲犯應敘及承審遲延各職名仍令照例咨部辦理至此此外尚有姦夫聽從謀殺未婚夫並未婚妻謀殺本夫分別起意聽從及並不知情各條_臣等謹一併酌議繕具清單恭呈

御覽伏候

命下

_臣

部行文各直省一體遵照辦理統俟下屆修例時纂入例冊永遠遵行等因道光二十三年九月二十五日奉二

十六日奉

旨刑部奏遵旨覆議安徽民人宋志忠因姦謀殺未婚本夫罪名並將酌議條例開單請旨著刑部再行覈議具奏欽此謹將酌議因姦謀殺未婚夫姦夫姦婦治罪條例開列於後一與人聘定未婚之妻通姦起意謀殺其夫者照姦夫起意謀殺親夫例擬斬立決如係為從同謀仍照同謀殺死親夫律擬斬監候若雖未起意而同謀殺死未婚夫之後復將姦婦娶為妻妾或拐逃嫁賣者亦照例斬決

_臣

等謹按例載姦夫起意殺死親夫之案姦夫擬斬立

決若雖未起意而同謀殺死親夫之後復將姦婦拐逃或為妻妾或得銀嫁賣者亦均斬決等語細繹例意蓋以姦夫起意殺死本夫較之聽從謀殺者情罪尤重故於同謀斬候律中提出起意一層加以立決所以懲淫惡之尤也若姦夫雖未起意而事後將姦婦拐逃嫁賣則其情亦重故其法亦不得輕臣等現經酌議請將起意謀殺未婚夫之姦夫照例擬以斬決則姦夫雖未起意而事後有拐賣情事者亦應照例斬決其無起意及拐賣情節者向係照律斬候自可遵照辦理

一聘定未婚妻因姦起意謀殺本夫者應照妻妾因姦同謀殺死親夫律凌遲處死如並未起意但知情同謀者即於凌遲處死罪上量減為斬立決若姦夫自殺其夫未婚妻果不知情即於姦婦雖不知情絞監候律上減為杖一百流三千里倘實有不忍致死其夫之心事由姦婦破案者於流罪上再減一等杖一百徒三年至童養未婚妻因姦謀殺本夫應即照謀殺親夫本律定擬

臣等謹按律載妻妾因姦同謀殺死親夫者凌遲處死若姦夫自殺其夫姦婦雖不知情絞監候等語誠以妻



之於夫名分至重恩誼尤隆故與聞謀情卽處以極刑不知謀情亦予以縲首罪至重也至聘定未婚妻之於夫有名分而無服制臣等竊以為名分所關則當屈情以伸法服圖不載又當畧法以原情如未婚妻因姦起意謀殺本夫其所以殺之之心原謂其有夫之之義且姦夫造意旣應加重則姦婦造意亦不能減輕臣等悉心酌議如果未婚妻因姦起意謀殺本夫者則戀姦首惡情罪甚重應有凌遲處死成案應仍遵照辦理若係姦夫起意未婚妻僅止知情同謀者其情較起意稍輕

似應于凌遲罪上量減為斬立決至未婚妻果不知情則情罪更輕應於絞罪上酌減滿流事由姦婦破案尙有不忍致死其夫之心在已婚妻例得夾簽隨本減流者卽行遞減滿徒以示區別而昭平允至童養妻雖未成婚然業經過門恩義已重自應悉照已婚辦理

以上二條臣等謹參酌例案悉心定擬是否有當恭候欽定俟奉

旨後臣部行文各直省遵照辦理仍俟下屆修例時載入例冊永遠遵行



據安徽巡撫程

奏宋志忠因姦謀殺未婚夫查六壽

身死請定科條一摺經

臣

等酌擬姦夫罪名暨未婚妻有

無知情同謀各條例於道光二十三年九月二十五日具

奏二十六日奉

旨刑部奏遵旨覆議安徽民人宋志忠因姦謀殺未婚本夫罪

名並將酌議條例開單請旨著刑部再行覈議具奏欽此

仰見我

皇上慎重刑章務期平允之至意

臣

等遵查宋志忠與查六壽

聘定未婚妻朋氏通姦圖娶為妻獨自起意謀殺查六壽

身死此等姦夫律例並無治罪明文遍查歷年成案如顏

大等四案俱照起意謀殺親夫例擬斬立決錢亥澂等六

案俱照同謀殺死親夫律擬斬監候援引既涉兩歧折衷

應歸一是

臣

等覆思未婚妻之與本夫有名分而無服制

名分已定則惡極必加重誅所以植夫婦之大綱服制無

闕則情輕必為末減所以明未婚之有別若姦夫則凡人

也彼夫婦之已婚未婚悉與姦夫無涉其不用凡人謀殺

之法者蓋因姦而殺固宜加嚴因姦起意而殺尤宜加嚴

且推其戀姦情熟起意殺死未婚夫與戀姦情熟起意殺



死已婚夫者其處心積慮之淫兇毫無二致臣等再三商確衡情定罪應請嗣後如有姦夫因姦起意殺死未婚夫之案卽照姦夫起意殺死親夫斬立決例擬斬立決如蒙俞允所有宋志忠一犯應請仍照臣等前議請

旨卽行正法至朋氏向宋志忠盤出謀殺情由卽告知伊父轉同屍親告知得以破案核與不知情之絞婦事後首告例得減流者情事相倣惟尚未成婚自應於流罪上再減一等擬杖一百徒三年其私埋匿報之金松如等均應如該撫原題完結仍令查取應敘應議各職名照例咨部辦理

至此外尚有姦夫聽從謀殺未婚夫並未婚妻謀殺本夫分別起意聽從及並不知情各條臣等謹一併悉心酌議縷晰開單呈

覽恭請

欽定伏候

命下臣部行文各直省一體遵照辦理統俟下屆修例時纂入例冊永遠遵行等因道光二十三年十月初四日奏本日奉

旨宋志忠著卽處斬餘依議欽此

一與人聘定未婚之妻通姦起意殺死其夫者照姦夫起意殺死親夫例擬斬立決如係為從同謀仍照同謀殺死親夫律擬斬監候

臣等謹按例載姦夫起意殺死親夫之案姦夫擬斬立決等語是從前定斬決之例原惡其起意而加嚴今姦夫殺死未婚夫被殺者確係本夫殺人者確係姦夫其造意謀殺又確係因姦起衅是與殺死已婚夫情無二致應即照例子以斬決至為從同謀之姦夫較造意者情節稍輕向係照律斬候自可遵照辦理

一姦夫雖未起意而同謀殺死未婚夫之後復將姦婦娶為妻妾或拐逃嫁賣者亦照例斬決

臣等謹按例載姦夫雖未起意而同謀殺死親夫之後復將姦婦拐逃或為妻妾或得銀嫁賣者亦均斬決等語此指謀殺已婚夫之後又有別項重情而言今姦夫同謀殺死未婚夫如亦有拐娶嫁賣各重情自應照例問擬斬決

一聘定未婚妻因姦起意殺死本夫應照妻妾因姦同謀殺死親夫律凌遲處死如亞未起意但知情同謀者即於凌

遲處死律上量減為斬立決

臣等謹按律載妻妾因姦同謀殺死親夫者凌遲處死等語誠以妻之與夫關係名分服制之重故起意同謀均處以極刑並無首從之分惟未婚妻有各分而無服制若因其名分已定雖為從亦予以重典未免與有服制者漫無區分若因其並無服制而遂概為減輕又覺置聘定夫婦名分於不問檢查從前成案四川省吳六女貴州省楊金妹俱係因姦起意殺死未婚夫問擬凌遲處死湖北省望蘭大亦係起意殺死未婚夫問擬斬

決復經臣部改擬凌遲詳核各案原以未婚妻名分既定而又因姦起意殺死本夫推其謀殺之心彼亦知夫婦之義無所逃於天地之間不殺其夫終難遂其戀姦之意故忍而出此也此等婦女實為淫惡之尤不得以並無服制稍從寬典即如妻妾改嫁於故夫之父母並無服制可言而有謀殺及毆殺者皆以名分尚在概予極刑比類參觀則未婚妻起意殺死本夫擬以凌遲處死似為情真罪當惟僅止知情同謀其情較起意稍輕自應量於末減擬以斬決庶於維持名分之中仍示量

為區別之義

一姦夫自殺其夫未婚妻果不知情即於姦婦不知情絞監候律上減為杖一百流三千里倘實有不忍致死其夫之心事由姦婦破案者再於流罪上減為杖一百徒三年

臣等謹按律內姦夫自殺其夫姦婦果不知情問擬絞候例內不知情之姦婦如事後首告尚有不忍致死其夫之心者仍照律定擬法司夾簽聲請減流是情事愈輕故罪名遞減也今未婚妻謀殺各條既與已婚者有別則不知情及事後首告各情節自應亦較已婚者以次

減輕由絞而減流由流而減徒悉照律例著為等差准七成案之止科姦罪者似為允當

一童養未婚妻因姦謀殺本夫應悉照謀殺親夫各本律定擬

臣等謹按例內童養未婚妻與人通姦本夫及有服親屬皆許捉姦蓋以童養妻雖未成婚而禮重見舅姑故可與已婚妻並論檢查從前成案童養妻殺死本夫及姦夫自殺其夫姦婦並不知情均照已婚妻例辦理以後仍應照辦相應知照江西巡撫遵照可也等因道光二

十三年十一月二十九日江省准咨

